

欽定剿平粵匪方略

欽定勦平粵匪方略卷一百八十八 戊午年

二月初五日 辛亥 勝保袁甲三奏言固始被圍日

久臣等前飭縣丞田玉梅入城幫同守禦參將
張得勝帶勇八百名及李孟羣派赴西路之南
勇五百名均由迎河集縋城而入登陴助守正
月十八日該逆又將固城東南偷挖之地雷舉
發城垣轟塌數丈經參將張得勝等會同在城

官紳扼據塌口張曜田玉梅卽將槍礮分調東
城樓上及東南城隅連環轟擊斃賊二三百名
城上趕用沙袋木器填砌一律槍護完固城垣
得保無虞竊以逆匪覬覦孤城疊經援兵痛勦
尙無退竄之心其黨四關密布非各軍緊逼晝
夜環攻不易解此重圍惟臣勝保隨營馬步官
兵數僅一千餘名合之各起勇隊亦不過三四

千名其前調各處團丁本欲借助聲威無如初
經戰陣紀律不諳銳進易退勦賊不能得力疊
催英桂迅飭德楞額等趕帶馬隊前來原期藉
資扼截以顧豫境大局並非爲臣一營添兵起
見而英桂以宛郡餘匪未靖不能抽撥不得已
又復商將截留赴楚餘丁飭赴光州助勦昨據
函覆兩湖督臣官文已調去百名其餘三百名

必須親帶隨行不能應調竊思軍情緊急臣所
盼者在援兵之早至不在英桂之親來此股逆
匪數衆勢悍臣勝保兵力有限力援固始已費
經營扼截光商豈孤軍所能兼顧遠如六安正
陽三河尖近如光州商城一帶路路宜防且固
始城圍已久米穀無多儻各路援軍不能應調
恐糧盡力窮變生莫測不敢不據實直陳

勝保袁甲三又奏言頃探聞河南撫臣已至汝陽派龍澤厚帶兵八百名馬隊三百名前赴固始協勦查粵逆勢甚猖獗非龍澤厚一軍所能獨力勦辦卽如李孟羣派來兵勇亦數千名祇以統率無人未能得力臣愚以爲與其自樹一幟兵分力單不如歸臣調遣厚我兵力自能迅解城圍可否

飭令赴援固始協勦粵逆官兵俱歸臣等就近調度庶
號令齊一於事有濟據獲賊供稱粵逆探知西
南甚虛意欲分股繞犯商城臣軍勢難兼顧懇
恩飭下英桂速撥馬隊前來以資協勦奏入

上命軍機大臣傳諭英桂勝保袁甲三曰固始縣城被
圍已久情形危急英桂所帶兵勇自以赴援固始爲
要豈可遠駐汝郡致成株守著英桂卽帶馬步各隊

星速前進會同勝保攻勦卽一時不能親往亦著將
德楞額等馬隊迅速派赴固始其截留赴楚餘丁著
一併飭令先赴勝保軍營該撫卽隨後繼進現在勝
保督兵鏖戰而英桂徒事遷延儻有疏虞惟該撫是
問至該匪既有分股繞犯商城之語則西路亦應嚴
防並著英桂會同勝保妥籌策應至龍澤厚一軍及
李孟羣派來兵勇本應歸勝保調度如有援勦不力

觀望推諉者卽著從嚴叅辦

初六日壬子和春奏言軍營與糧臺同辦一事必

須和衷方能有濟上年十一月間總司糧臺文

煜來營臣告以江南糧臺現辦章程係奉到部

頒文武應領銀數清冊遵照辦理惟千把額外

末秩清苦從前向榮於各員例領之外酌加數

兩數年以來未之有改現惟有循照舊章辦理

文煜亦唯唯而去數旬後有糧臺委員到營面
稱如仍循照舊章例外加增總須奏明方可照
行經臣與督臣何桂清會銜入告仰蒙

聖主逾格鴻施准仍照舊支發嗣該總司又以官弁鹽
折浮濫太多等語上

聞仰荷

皇上聖明俯鑒軍情功在垂成不惜小費營中奉

旨之日萬衆歡呼今該總司又以糧臺各歸各任不復
套搭支放請

旨飭下通行查此事係爲糧臺報銷時畫清界限起見
於

國帑毫無增減徒令軍心疑惑今該總司明知軍
中奉行日久斷難驟改而必欲遽更舊章勢必
至激成事端夫兵弁口糧宜有等差始無爭競

今據糧臺冊開兵勇月支銀肆兩伍錢外加食米而額外鹽糧僅三兩有奇營兵由馬戰守遞拔三次始得額外而領項轉少於兵輕重未免失當領餉兵勇遂有官不如兵何必出力打仗再圖升官之語是兵勇爲異日拔補弁缺後領餉起見不待官弁從中慫恿也軍中按月領餉日久習爲故常從無提及欠餉一事今忽奉文

截清界限衆軍咸疑糧臺爲短發欠餉起見人
言籍籍實屬無從理喻軍中賞罰之外惟信可
以服衆今則朝更暮改無以取信此後滋事更
有甚者臣再三思維不得已籲懇

天恩簡員接辦糧臺抑或

飭下何桂清另行派員之處伏候

聖裁奏八

上命軍機大臣傳諭和春何桂清曰江南糧臺兵餉浮支濫領日久相沿前據該大臣等奏請量子加增朕以其功在垂成業經降旨暫允所請文煜總辦糧臺循守例案原爲慎重錢糧然如該大臣所奏弁兵未能深悉衆議沸騰亦於軍情有礙自未便仍留總辦致有齟齬所有江南糧臺著何桂清揀派妥員接辦固不可如文煜之過涉拘泥亦不得因弁兵挾制漫

無稽察總期大功速成則費少而省多朕亦不以例
案相繩若日久耽延豈能不加以裁抑該大臣等必
能仰體也至文煜前奏放餉月分畫清界限係爲報
銷時易於覈算並非將舊欠概行停止該弁兵等何
以妄生疑謗此後應如何辦理之處著何桂清督飭
接辦之員酌覈妥辦

上諭內閣曰江蘇布政使文煜著來京另候簡用

和春又奏言正月初三日該逆於北面太平神策兩門突出悍匪數股並由下關乘駛礮船十餘隻犯我水陸各營張國樑親督副將張玉良周天培馮子材等分兵三路迎勦都司賴鎮海等統率水師沿河夾擊斃匪二三百名餘賊屍水而逸初十十一等日該逆先後於七里洲金川門等處出賊數百名潛襲水陸營盤均被我

兵擊退十二日該逆於下關擁出二千餘衆礮船數十隻分爲兩路攻撲營牆別於太平神策等門出賊堦抄其東南隅七橋窺賊巢同時犯我營壘張玉良當派遊擊黃朝恩等分路迎敵舟師水陸會攻斃賊無算忽太平門賊壘續出悍匪千餘人三路撲犯以圖牽掣張玉良馮子材各帶所部轉戰直前先撥勁兵分攻神策門

左右一面仍赴太平門督戰斃賊四五百名遊
擊張成伍把總向國秀外委金世柱同時陣亡
其七橋壘之賊經張國樑派總兵王浚副將戴
文英兩路迎剿擊斃賊匪多名初四日東北各
門又出賊匪攻撲賴鎮海等各帶水師由七里
洲包抄而進衝入賊叢賊勢披靡我軍槍礮連
環賊屍枕藉是日陣亡把總楊恆山一員忽洪

武通濟兩門出賊數千人蠡擁而來張國樑親督將弁以奇兵繞襲其後賊相顧駭愕奪路狂奔我軍乘勝抄殺殲斃無數七橋壚一股亦經王浚等擊敗無不鼠竄回巢正月初五夜殷巷之賊潛出三千餘人撲我營盤經兵勇擊退初六初七至十二十六等日傅振邦等自祿口張公渡等處進攻秣陵關連獲勝仗疊有斬擒把

總王天爵力戰陣亡查秣陵一關屏蔽金陵南面其地大河憑阻港汊縱橫賊又於近關左右密布堅營臣等籌度形勢現飭總兵李若珠副將周天培帶勁旅三千人前往會同虎坤元妥爲布置一俟秣陵克復以次進逼聚寶門兩花臺全局方有把握此次陣亡之遊擊張成伍等五員應請

飭部從優議卹奏入

上諭內閣曰逆匪經此次痛勦勢已窮蹙著和春等嚴飭將士奮力環攻先將秣陵關克復以次進逼金陵城垣毋稍延緩遊擊張成伍守備楊恆山把總向國秀王天爵金世柱臨陣捐軀殊堪憫惻均著交部從優議卹

和春又奏言賊匪竄踞黃池窺伺高淳東壩壘

經提督德安乞援當卽挑撥兵勇二千四百餘
名交副將吉連管帶馳往聽候調遣探得該逆
由黃池竄踞烏溪分竄灣沚現復擾及水陽一
帶逼近甯國府城查甯郡爲江浙門戶該處賊
衆兵單亟宜迅速應援現派總兵傅振邦管帶
湖南官兵一千一百餘名剋日由秣陵關馳赴
甯國會同鄧紹良協力堵剿奏八報

同日德興阿翁同書翰殿華奏言據探金陵賊
援渡江接應江浦並有大股賊匪由南岸渡江
將至石磧橋地方臣德興阿飭成明富明阿帶
領兵勇由湯泉一帶前進至石磧橋迎截外援
之賊其時金陵援賊糾結皖境烏江匪黨竄踞
石磧橋正在添築營壘圖援江浦城內之賊成

明富明阿等各帶馬步兵勇於正月二十四日直抵該處分五隊圍攻都司王希堂首先搶入賊壘東門手刃悍賊二人該逆驚亂突由賊壘西門竄出二千餘名分三股抗拒協領博奇營總舒通額帶馬隊由左翼進擊協領烏爾恭額營總常壽帶馬隊由右翼進擊成明富明阿帶馬步兵勇由中路進擊併力奮勦斃賊無算追

抵江邊餘匪爭渡官兵於渡口蹙之殲斃及溺死者甚衆共殺賊千餘名生擒二百餘名立將石磧橋賊壘踏平援應江浦之賊悉數殲除成明富明阿旋派馬隊設伏於山谷間而令兵勇執所獲賊匪黃旗假充賊援爲誘戰之計維時江浦城內之賊遙見黃旗以爲外援已至果由西門出賊千餘人接應我軍奮勇直衝刀矛相

錯逆衆敗退副都統富春等帶馬隊由北面橫
衝將賊追至城濠該逆潰遁回巢又殺賊百餘
名此次外援希圖接應經馬步兵勇一鼓殲擒
實足以壯軍聲在事尤爲出力之協領舒通額
等先行開列懇

恩獎勵臣等檄調水師現泊江西口一俟風利上駛卽
擬水陸會攻規復江浦奏入

上

諭內閣曰此次擊勦援賊大獲全勝勦辦尙屬得手
著德興阿嚴飭在事文武迅將江浦縣城克復埽蕩
江北逆黨以期速克金陵毋稍延宕在事尤爲出力
之協領舒通額著賞給圖薩台巴圖魯名號都司王
希堂著賞給濟勇巴圖魯名號驍騎校德陞額著以
佐領儘先卽補巴彥圖魁成均著以防禦儘先卽補
千總許得把總馬慶長均著賞換花翎千總孫文友

李有才均著以守備卽補兵丁鮮玉龍著以把總儘先卽補披甲慶順著以驍騎校儘先卽補

初九日乙卯福興奏言江省自上年十月皖匪大

股內竄分擾吉臨兩府被官軍截擊未能過河

西犯麇集撫州一帶臣以該逆不能逞志於西

難保不圖東竄廣信所駐之軍本屬單薄本月

十四日據管帶平江營同知李元度稟稱進賢

東鄉股匪萬餘人於十三日竄至鄧家埠臣卽
飭李元度簡派隊伍馳往鷹潭南岸堵剿其金
谿之賊糾合撫州逆黨數千竄至青田橋卽令
駐防泥灣之武威軍會同鄉團就近嚴防上清
等處十八日賊竄鷹潭平江營分路迎擊殺斃
賊匪二百餘名其沿河抄來之賊均被水師擊
退時青田橋竄匪已至上清泥灣經武威軍奮

力擊退二十四日鷹潭之賊竄至楊林橋神元
洞一帶查此路山徑歧出處處可通河鎮當分
調兩營馳赴港口一帶以圖扼截仍一面飛飭
李元度竭力堵剿以杜內犯之路儻該逆從南
岸直趨河鎮勢必窺伺信城臣惟有親督兵勇
由北岸繞出賊前以顧郡城根本惟隨營兵力
甚單不敷防剿前奉

旨調派粵師二千名尙無到江確信刻下東路緊迫別
無可調之兵已咨會浙江撫臣嚴防邊境並照
會衢州鎮總兵揀派勁旅數千名馳赴廣信河
口一路併力迎勦以固江浙門戶奏入

上命軍機大臣傳諭福興晏端書耆齡曰廣信一郡爲
江西完善之區逆匪久思窺伺現在進賢之賊已由
鷹潭竄至楊林橋神元洞一帶山路叢雜處處可通

河鎮若竟由南岸直趨則信郡必被滋擾業經福興
照會衢州鎮總兵饒廷選前往廣信河口一路堵剿
著晏端書卽飭該鎮揀派勁旅趕赴廣信相機迎剿
以固江浙門戶前調潮州鎮總兵壽山帶兵二千名
赴援江西爲時已久何以尙未行抵江西或該總兵
已到撫州著福興耆齡派員迎提以便合兵攻剿現
在援兵未集仍著該將軍督飭帶兵各員奮勇勦擊

毋得專待客兵致滋貽誤

十五日辛酉福興奏言逆匪自竄至楊林橋神元

洞地方臣卽調兵勇馳赴南岸扼擊詎賊行甚

速已由上坊直趨河鎮臣度該逆志在迅犯廣

信卽親督兵勇於二十六日馳往河口堵遏並

調平江勇兩營趕赴弋陽駐守二十七日至河

口北岸賊衆同時竄至南岸蠡擁搶渡我軍槍

敵齊施將賊擊退臣將北岸各軍紮定營壘卽
親帶數人馳至廣信於城外紮營以備堵禦現
在大股逆匪仍踞河鎮後面匪衆紛至沓來並
探聞另有一股從胡坊竄至鉛山縣查鉛山南
與福建之崇安縣接界東由廣豐旁通浙之江
山縣境歧途四出在在可虞前調總兵饒廷選
一軍已抵玉山臣因河鎮已有賊蹤卽令在玉

山駐紮以防東竄並令該總兵迅撥勁兵前赴
廣豐嚴堵賊竄江山之路臣隨營兵力本屬無
多撫臣耆齡現撥濟勝彰武兩軍約有千餘人
日內方能起程臣已疊次催提如果河鎮大股
由南岸窺犯郡城卽就現有各軍極力攻擊以
保信郡奏入

上命軍機大臣傳諭福興王懿德晏端書耆齡曰賊匪

已竄至河口鎮廣信情形喫緊雖經福興派令兵勇扼紮河鎮北岸兵力尙單所有耆齡派出之濟勝彰武等兵千餘名何以遲遲未到著卽飭星馳赴援其潮州鎮總兵壽山接兵著福興耆齡迅速催提前進福興現赴河鎮相機調度其饒廷選一軍已到玉山著晏端書飭令嚴防賊匪東竄並撥勁兵馳往廣豐以杜賊竄江山之路另股賊匪蔓延鉛山與福建崇

安接界著王懿德酌量閩省如有可調之兵卽派得力大員督帶一二千名或由邵武進勦建昌或卽由崇安取道前進與江西兵勇聯絡一氣以分賊勢者歸仍當就近撥兵前赴鉛山一帶以資援應

十六日壬戌晏端書奏言江西自臨江克復後敗

匪萬餘人由進賢東鄉竄擾貴溪各邊境又引撫建之賊渡河而東圖犯廣信河口頃准福興

來咨賊已竄至河口鎮該將軍現赴信郡河口
間道百出可以近窺浙境已咨饒廷選移紮玉
山兼固衢防等情河口軍情萬緊廣信玉山廣
豐等處均形喫重廣豐與江山接壤該二縣無
兵駐守難保該逆不乘虛竄擾當飭副將周萬
達等各帶兵勇先赴玉山饒廷選卽於二月初
二日親統漳勇相機援勦並派參將胡定國等

帶勇馳赴江山分別駐守惟開河口賊匪實有
竄信犯浙之勢浙江連界處所均須重兵扼守
衢防各軍共六千餘名現撥玉山廣豐江山各
路已去五千有餘兵勇不敷布置查有駐守婺
源之浙兵一千餘名尙可就近抽調已咨商張
芾飭令此項浙兵暫赴玉山以壯軍威奏入

上諭曰覽奏已悉保障完善之區固屬緊要然近防不

如迎勦若稍有畛域之分信郡不守浙境焉得獨全
懍之

晏端書又奏言據道員仲孫懋稟稱該道等扼
守黃池此次逆匪衝竄不能固守待援罪有應
得請嚴行叅處又接鄧紹良咨稱逆賊屢犯涇
南是以親駐南陵黃池倉猝失利救援不及請
據實奏叅並將夏寶慶等一併叅處各等情查

黃池之役仲孫懋諸軍憑營決戰相持三日因
眾寡不敵退守新豐尙非不戰而潰但仲孫懋
等不能固守待援鄧紹良不能兼籌守禦究屬
咎無可辭相應請

旨將署浙江提督鄧紹良交部議處道員仲孫懋都司
夏寶慶遊擊胡鳳鳴守備余義政一併暫行革
職仍留甯國軍營以觀後效奏入

上諭內閣曰此次賊竄黃池鄧紹良因駐軍南陵不及
援應仲孫懋等不能固守待援雖因衆寡不敵均屬
咎有應得署浙江提督鄧紹良著交部議處道員仲
孫懋等均著暫行革職仍留甯國軍營以觀後效

十八日甲子英桂奏言臣連日接勝保咨函上月

二十五日勝保督隊進剿固始賊匪大獲勝仗
臣所派往吉林黑龍江馬隊餘丁二百名龍澤

厚等所帶陝兵一千名已於二十七日馳抵固
境紮營楊光店地方勝保督率兵勇分路進剿
共斃賊六七百名安徽藩司李孟羣督勇赴援
已由商城進紮固境之宋家集約期會剿探聞
該逆因圍始附近無糧可掠分股向商固交界
之郭陸灘樟柏嶺等處竄擾商城情形倍形喫
重查固圍日久未解商城又有匪蹤亟應剋日

赴援臣俟阜陽一帶匪股殄除卽親督隨營兵
勇馳往固始協剿以期迅解城圍奏入

上命軍機大臣傳諭英桂勝保曰固始城圍未解該逆
復分股向商固交界之郭陸灘樟柏嶺等處竄擾商
城情形倍覺喫重該撫所派馬隊及龍澤厚等所帶
陝兵已馳抵固境李孟羣亦由商城進攻固始必能
協同勝保迅解城圍此時英桂應進兵何處若固始

解圍賊竄商城自宜以保護商城爲急如兵力不敷
著英桂勝保酌量撥兵策應李孟羣赴援固始六安
之匪現在何人督辦總須通籌緩急不可顧此失彼

欽定剿平粵匪方略卷一百八十九 戊午年

二月十九日 乙丑 勝保袁甲三奏言 臣勝保於二

月初二日親督各軍由固城北而進攻髮逆於
東西兩路各分三股向前衝突我軍整隊迎擊
將東西兩路敗賊盡壓回巢共斃賊七八百名
初六日復飭各軍進逼賊壘越濠而登忽從東
岡賊營撲出大股二三千人我兵直前迎截明

慶等帶領馬隊從後抄入斃賊三百餘名餘逆
回巢卽將近巢房屋焚燬以清我軍進攻之路
初八日樂善帶領河南南陽山東曹州兩鎮及
川楚各隊兵勇由北而西直攻三仙莊賊壘參
將格洪額成景帶隊由東面攻取各巢臣勝保
統帶親軍由中路進李孟羣各軍進剿固始西
路直擣西關正在踰越濠牆詎該逆分出數股

由東南岡六七里外繞道抄裏將李孟羣等困
在垓心各營馬隊趕到衝入賊中槍箭齊施賊
盡披靡臣勝保督軍進攻北面賊壘直抵木城
逆衆分股撲出我兵槍礮連環正在酣戰之際
遙見賊由西南又分數股抄裏而來臣勝保飭
令廣勇開化勇由西抄擊川勇健勇由東迎勦
並開放京營大礮轟擊統計斃賊一千二三百

名生擒僞檢點陳得彬僞將軍劉聚得等正法
查此股粵匪圍撲固城逆黨不下數萬自臣勝
保疊挫兇鋒斬馘解散已有萬餘臣等惟有督
飭各軍合力勦擊仍由北路節節移營進逼以
期力解城圍

勝保又奏言近勦固始圍城逆匪五戰皆捷李
孟羣紮營宋集因無馬隊衝擊均由臣營酌撥

助剿前准湖廣督臣官文咨會現撥參領舒保
帶馬隊二百名前來援剿復准河南撫臣英桂
咨稱此起馬隊統歸臣營調遣正在迎催探知
逆匪已分股由郭陸灘樟柏嶺一帶竄擾商城
臣查舒保已於正月二十四五日行抵麻城商
境毗連朝發可以夕至乃半月之久尚無到營
信息現在一面迎提舒保一軍一面咨商英桂

迅由新蔡光息一路前進遏截商城竄匪不令
深入俾臣得專力迅解固始之圍仰懇

天恩飭令英桂酌量情形移緩就急保衛商城並請
飭下官文迅催援兵來豫以維全局奏八

上命軍機大臣傳諭官文英桂勝保曰現在勝保五戰
皆捷兵威大振兼有李孟羣在宋集助勦城圍不難
立解但逆匪分竄商境勝保無兵分撥著英桂卽行

帶兵赴援商城毋令賊勢蔓延至舒保已抵麻城何以疊經勝保迎催尙未趕到著官文嚴飭舒保統帶馬步隊迅卽出境由光商進發以便沿途協剿

二十日丙寅官文都興阿胡林翼奏言前因賊圍

固始分竄商城切近湖北麻城邊界奉

旨派兵出境迎剿當卽抽撥九江營勇三千人隨同副都統舒保馬隊二百名前往防剿嗣復添撥駐

防興國之勇五百人亦隨同舒保前往統計馬步三千七百人足成一軍其襄樊步兵不滿千人應請毋庸再撥奏入報

二十二日戊辰福興奏言逆匪從河鎮下游搶渡

經水陸各營擊退該逆無隙可乘遂分股沿河東上我軍槍礮齊施逆勢不支紛紛敗退陣斬

百餘名訊據獲賊供稱洪逆以金陵危急數次
赴撫求援石逆遂率撫建新淦之匪傾巢而出
撫建郡城各留廣匪千餘其餘悉數東竄分爲
六起號稱十餘萬本擬南北夾攻先踞廣信直
犯蘇杭以分金陵之勢因河口北岸堵剿嚴密
思由南岸疾趨廣信僞信郡無從措手卽繞由
廣豐分竄江山玉山以入浙境等語旋據探報

賊已分股進撲廣豐經總兵饒廷選派參將胡
定國迎擊臣復派西安等營兵勇一千四百名
分路雕勦兼爲廣豐聲援惟西省浙省交界處
所防不勝防非併力兜擊則處處爲所牽掣必
致旁竄浙疆臣營兵力本單總兵饒廷選所統
各軍除分守廣豐外亦形單薄後路自常山以
至蘇杭並無重兵扼紮臣卽飛咨兩江督臣何

桂清候補三品京堂張芾迅派重兵扼守衢嚴
一帶旋聞賊已越廣豐而北饒廷選率所部馳
扼大南橋臣復調黃岡果勝等兵勇千人星夜
前往協勦詎料該營行至沙溪探聞賊已竄至
大南橋饒廷選一軍退紮玉山臣令黃岡果勝
兩營卽在沙溪駐守以通廣玉往來之路其彰
武濟勝兩軍已經臣疊次催提計日可到一俟

抵郡後卽當派赴玉山會勦刻下信郡可保無
虞惟賊勢圖竄浙疆後路逆蹤不絕臣仍守信
郡勢難兼顧合無仰懇

聖恩俯念浙疆喫緊

飭下金陵大營迅撥勁兵數千馳扼嚴衢保全大局奏

八

上命軍機大臣傳諭和春張國樑許乃釗曰據福興奏

洪逆以金陵危急求援於石逆石逆遂率撫建新淦之匪傾巢而出號稱十餘萬擬先踞廣信直犯蘇杭現在逆匪越廣豐而北饒廷選已退紮玉山福興所有之兵祇能專顧信郡其旁竄浙疆之路在在空虛等語逆賊率其大股旁竄浙疆意圖分我兵力設一日闌入不獨金陵功敗垂成東南大局豈堪設想著和春等卽調撥勁兵二三千名選派得力大員管帶

集賢堂 卷一百一十一
前往浙江常山玉山一帶扼要截擊並與饒廷選會
商進剿機宜併力堵禦保全浙境卽以截斷金陵援
賊該大臣等當以大局爲重毋稍延緩

上又命軍機大臣傳諭王懿德曰本日據福興奏石逆
因金陵逆賊疊次求援欲由江西東路直犯蘇杭以
掣金陵大兵之肘賊衆傾巢而出分作六起號稱十
餘萬已竄過廣豐饒廷選一軍退至玉山情形危急

等語賊旣專注浙省自以堵賊犯浙之路爲急糧道
趙印川帶兵素稱得力此時尙在邵武一路著王懿
德速於閩省各標營內抽撥勁旅數千名卽交趙印
川統帶由崇安前進繞出賊前相機堵剿一切糧餉
軍裝均著迅爲籌備

同日何桂清奏言前奉

諭旨令臣揀派妥員接辦江南糧臺查糧臺有奏事之

責新任江蘇藩司王有齡籌措軍餉業已昕夕
不遑勢難兼顧江甯藩司楊能格現辦江北糧
臺應請

旨另行簡派大員接辦江南糧臺事務以便文煜交卸
奏入

上諭內閣曰前任湖南布政使徐有壬著馳驛前往江
蘇接辦江南軍營糧臺事務

二十四日

庚午

和春奏言金陵逆匪盤踞秣陵關

恃險負隅並分布醜類於關之西北隅直接城南雨花臺中有殷巷又踞之以通接濟該逆於正月二十四五等日由東南北各關糾黨傾巢出撲其殷巷郭家橋黃泥菴一帶賊壘亦以大股接應當派總兵李若珠周天培等督兵分途迎勦總兵虎坤元親督遊擊馬德昭等馬步兜

圍縱橫盪擊殲賊五六百人餘皆奔竄二十九
日東南兩關之賊絡繹出巢意圖掩襲虎坤元
卽派將領截擊自率親軍陷陣直擣中堅斬馘
無算傳令疾趨東關虎坤元揚旗先登越過濠
溝手刃數賊斬關而入胸受槍傷登時陣亡城
中突出悍賊三四千人麇集距關五里之白塘
村乘虛攻撲並於黃泥菴左右添築數巢俾我

軍不能深入二月初二日賊由東南北三關暨
股巷等處糾衆七八千人分路撲營其東南一
股經參將陳雲彪等前後包抄賊勢大潰副將
戴文英率領馬德昭等迎勦東北一路斃賊約
千餘人李若珠等乘勝渡河繞出郭家橋之背
聯築三營初八至初十等日所築新營一律完
竣橫截秣陵股巷之衝探知賊中糧藥均繞道

數十里方能入關賊情洶懼臣當飭該鎮等迅將郭家橋黃泥菴一帶賊壘先行掃蕩以成破竹之勢十二日我師派隊由郭家橋捲旗疾馳掩其不備該逆正在添築營卡戴文英揮兵齊進逆衆棄械四竄將賊營兩座焚燬十三日該逆又於白塘村王家莊等處潛築三營扼我進路李若珠等三路分攻一面派令將弁堵紮黃

泥菴口以牽制之十四日李若珠等將黃泥菴賊營悉數攻破秣陵勢成孤注不難一鼓蕩平午刻率領大隊直撲賊巢別以精兵千人多備火藥由蔡家莊包抄其後並因秣陵北達金陵該逆窮蹙之餘勢必鋌而出走卽分兵潛赴關北葛塘寺德勝橋白塘村等處分別設伏以備迎勦並派副將劉季三遊擊馬德昭等進攻東

北兩關是日戌刻北關一帶號火舉發知該逆將欲外竄官軍斬關直入大隊緣附而上內外賊巢同時縱火我軍盡力刺殺橫屍塞路追奔三十餘里共斃賊二三千人卽將秣陵關克復其殷巷杜橋一帶逆壘亦悉蕩平查秣陵一關遙峙城南該逆恃爲屏蔽凡糧米火藥外援接濟金陵悉由西路三山門板橋一帶起岸進城

今克復秣陵去其羽翼賊已聞風喪膽必須迅
速進兵分扼要衝斷其咽喉全局乃有把握臣
現飭調上下游水師駛泊三山水口與陸營聯
爲一氣旣絕其南來之糧食又杜其北竄之要
衝總期掃穴擒渠根株盡拔陣亡之把總周玉
洪外委蕭振邦李逢春傅吉順臨陣捐軀實堪
憫惜應請

旨飭部從優議卹

和春又奏言蒙宿一帶捻匪臨張密邇徐豫關
繫北路咽喉自應遵

旨撥兵赴援惟江南軍營自七里洲江口迤東轉南至
秣陵關聯營五十餘里已屬不敷調遣比因黃
池灣沚等處逆燄狻獬又撥勁旅千餘名分別
應援就此時兵數計之未敢再行抽調致有疏

虞連日接何桂清晏端書轉據福興咨稱有撫
州大股賊匪欲由廣信竄擾浙境之說臣等以
金陵城大地廣欲圖合圍尙慮兵單均以無力
援應爲歉謹據實陳明

和春又奏言湖南提督張國樑調度有方攻剿
機宜無不著著爭先各將士梟其成算用能摧
堅破敵所向有功可否仰懇

天恩賞換雙眼花翎以示

寵異廣西右江鎮總兵李若珠可否

交軍機處記名遇有提督缺出請

旨簡放雲南鶴麗鎮總兵周天培擬請

飭部從優議敘副將戴文英本係奉

旨記名總兵茲查有直隸通永鎮總兵虎坤元遺缺可

否卽以該員

簡放俾昭鼓舞奏入

上命軍機大臣傳諭和春張國樑許乃釗曰和春奏攻克秣陵關進圍金陵已明降諭旨將該大臣等加恩並將各將弁等分別獎卹矣惟據另片奏稱諭調蒙古宿官兵及福興咨調援兵均屬無可分撥等語蒙古一帶毗連北路尙可由山東等省調派惟廣信爲浙江門戶石逆以大股來犯已越廣豐而北進援之總

兵饒廷選退至玉山賊勢猖獗福興一軍萬難堵禦
浙江爲完善之區稍有疏虞蘇杭震動大局可慮石
逆此次內犯實爲金陵逆衆求援而來故盡率撫建
之賊傾巢出撲迴非尋常窺伺可比浙省兵勇未經
行陣深恐不能得力現在圍攻金陵之兵自未可抽
調著於各處留守官兵內酌量調派二三千名其統
帶將領必須實在得力之員始能以少禦衆著和春

等迅速選派卽令由浙江前赴常山玉山等處助剿
蕪湖爲金陵上游江路賊援未能斷絕尤應嚴爲之
防著和春等嚴飭水師實力堵截

上諭內閣曰秣陵關爲金陵南面屏蔽逆賊失此險要
不難一鼓殲除該大臣等通籌全局布置悉合機宜
和春著晉加太子太保銜張國樑著賞換雙眼花翎
許乃釗著以三品京堂候補仍著督飭將士迅圖克

復金陵同膺懋賞其在事尤爲出力之總兵李若珠
著遇有提督缺出由軍機處提奏周天培著交部從
優議敘副將戴文英卽著補授直隸通永鎮總兵以
示獎勵其餘出力員弁兵勇並總兵吳全美等所統
水師高瀋東壩等處防堵出力各員均著和春等查
明保奏陣亡把總周玉洪外委蕭振邦李逢春傅吉
順均著從優議卹

和春又奏言直隸通永鎮總兵虎坤元從征八
載忠勇性成前此克復溧水縣城暨湖墅龍都
兩鎮奮勇先登盡殲醜類該處紳民至今感戴
不衰追留守句容屢勦金陵援匪皆能以少勝
多年甫二十七歲志趣甚遠聲威極著賊匪見
其旗幟卽畏憚之自赴秣陵關會擒逆巢兩月
以來大小數十戰無不身先士卒陷陣摧堅詎

意大功未藏勇烈捐軀遠近軍民同聲悼惜其
父湖北宜昌鎮總兵虎嵩林現在溧水防堵已
派人護送靈柩回籍相應籲懇

天恩飭部從優議卹並於溧水湖墅及死事之處建立
專祠以慰忠魂奏八

上諭內閣曰直隸通永鎮總兵虎坤元年未三十隨同
伊父虎嵩林在江南軍營數載遇仗爭先戰功卓著

茲因攻擣秣陵關賊巢首先陷陣斬馘無算中槍陣
亡殊堪軫惜虎坤元著交部從優議卹並於溧水湖
墅及死事地方建立專祠以慰忠魂

二十六日 壬申 福濟奏言壽春鎮總兵鄭魁士自

去春桐營潰退扼守廬州尙能鎮定惟素性驕
蹇與諸鎮不和頗難駕馭該鎮本舊隸和春部
下曾爲和春管理營務驅策日久節制易施臣

與該鎮分屬同官未便過爲抑制應請

旨飭下鄭魁士仍赴江南軍營聽候和春調遣至廬州

一軍必須勇敢大員統率進剿查徐州鎮總兵

傅振邦膽略兼裕調度有方足當一面現聞赴

援甯郡紮營泰子店地方江南頗多名將該鎮

尙非萬不可少之人似可移赴皖北統帶廬兵

籌商進剿仰懇

飭下和春傳諭傅振邦酌帶北省精兵數百移紮廬州
以資防勦如蒙

俞允俟傅振邦抵廬後鄭魁士再行交卸前往奏入

上命軍機大臣傳諭和春曰據福濟奏總兵鄭魁士性
情驕蹇與諸鎮不和頗難駕馭請飭赴江南軍營聽
候和春調遣卽飭傅振邦酌帶精兵前赴廬州等語
廬州防備北路固屬緊要惟江南正當圍攻金陵喫

緊之際傳振邦幫同鄧紹良保守甯國亦屬得力之
員能否前赴廬州與鄭魁士對調著和春酌量情形
奏明辦理

二十八日戊甲晏端書奏言江西臨江敗匪與撫

建股匪竄踞河口於二月初五日由鉛山竄圍
廣信府屬之廣豐縣城胡定國所帶兵勇不敷
守禦總兵饒廷選親帶玉山兵勇馳往督剿於

初九日行抵大南嶺突有大股賊匪從嶺後分
路包抄該總兵未及築壘仍回玉山刻下廣豐
被圍甚急賊已逼近江山探聞石逆帶領撫建
匪黨傾巢而來意欲竄擾浙江以牽掣金陵之
師其竄浙之路不由廣豐竄入江山卽由玉山
竄入常山並據各路探報賊衆自河口以至上
饒廣豐蔓延百餘里不下六七萬人設廣豐不

守則由江山直竄衢州勢等燎原現在遊擊楊國正督率浙兵彪勇駐紮廣豐江山接壤之界首地方並經金衢嚴道繆梓飭調楓嶺營官兵三百名前往助守江山縣知縣余以增先經募勇五百名與官兵合隊福興派彰武奇兵四營赴玉山會同防剿並撥黃岡果勝兩營駐紮沙溪以爲後應饒廷選又於華埠防所飭遊擊黃

熊飛帶勇三百名駐紮南門加以婺源調回之
浙兵統計玉山兵數已有五千餘名臣卽飛咨
饒廷選統領各隊並飭楊國正由江山前進會
合夾擊力解廣豐之圍一面飛咨福興張芾援
師隨時策應其自衢州而下由金華嚴州以至
省城臣已會同官紳密籌布置以備不虞
晏端書又奏言黃池灣汴兩防自正月間逆匪

竄踞後到處擄人擄糧以圖內竄節經我師剿辦獲勝乃近日各路逆援又增至萬餘人處處密布直欲內犯建平東壩窺伺蘇杭查甯國防兵一萬數千名兵力未嘗不厚無如軍情路路喫緊各兵勇派防要隘十餘處愈分愈單甯郡情形萬分危急鄧紹良續於江南大營乞師而金陵攻剿正當喫緊兵力無可再分前該提臣

屢請募勇臣以經費無出未能遽允現在賊勢
實逼處此已函囑鄧紹良雇募精銳一二千俾
資防剿刻下急須保固南陵規復黃池灣汴亦
惟就現有兵力督飭各將士次第埽除奏入

上命軍機大臣傳諭福興耆齡晏端書曰江西臨江敗
匪與撫建股匪由鉛山竄圍廣豐縣城欲援浙江以
牽掣金陵之師自河日至上饒廣豐蔓延百餘里逆

賊不下六七萬勢甚猖獗玉山兵數已有五千餘名
晏端書咨令饒廷選統領各隊由江山前進會勦力
解重圍耆齡亟應撥兵合勦該省如劉長佑劉于瀆
普承堯田興恕等皆係得力之員耆齡酌量調派
務須繞出賊前迎頭截擊總兵壽山前帶廣東官兵
二千名由福建汀州取道赴撫建救援現在是否已
抵江西耆齡查明該鎮在何處逗留迅速催赴常

山玉山一帶毋許遲誤逆賊竄踞黃池潯汴後賊黨
日增意欲內犯建平東壩窺伺蘇杭鄧紹良因金陵
無兵可分添募壯勇所需軍餉較多著晏端書設法
籌撥源源接濟